

國

朝

列

卿

紀

國朝列卿紀卷之六十二

工部總論

夫工部尚書者古冬官司空之任也冬閉藏萬

空使掌邦事亦所以富充家使民無空者也自漢光武置民曹主繕修工作鹽池園苑以後南宋北齊俱爲起部至隋改爲工部尚書唐因之宋工部判部事一人以兩制以上充凡城池土木工役程式皆隸三使司修造案本曹無所掌是名存而實則亡矣矧土木之興出於宮苑伎巧制作之工主於內侍省而工部特掌其籍而已器械之精粗彼莫得而聞費用之多寡彼莫得而與也則工部爲散秩寧無感於李廔之議耶我朝設工

部尚書主天下百工營築之事其選並不輕授於勳績特著者
往往加至三孤而不才者不得濫吹竽於其間求其正身率物
阜財節用如黃忠宣老成練實而措置有方畢嘉會省徵嚴禁
而風節不撓其指不可多屈矧提督歸於內豎估會歸於牙猾
不甘同鼠耗亦已恥矣可責之雄挺執奏不爲無益之作耶是
其虛耗冒破之弊又不止於宋事矣而清源塞流寧無薛季宜
之慨嘆矣乎

國朝列卿紀卷之六十二

工部尚書年表

李

慶

順天順義人監生永樂十八年任二十二年遷兵部尚書加太子少保卒於交趾

金

純

直隸泗州人監生永樂二十二年任本年遷刑部尚書卒贈山陽伯

黃

福

山東昌邑人鄉舉永樂二十二年任宣德元年鎮交趾歷南京戶部尚書加少保卒贈太保諡忠宣

吳

中

山東武城人洪武末年國子生歷刑部尚書下獄永樂二十三年起任兼詹事府詹事累加少師正統七年卒於官

追封荏平伯諡榮襄

李友直

直隸清苑人革除中北平布政司吏宣德元年任提督工程不理部事正統三年卒於官

王

忬

陝西郿縣人監生正統八年任十一年致仕

石

璞

河南臨漳人鄉舉正統十一年任加太子太保景泰六年遷兵部尚書歷南京都察院左都御史

江淵 四川江津人進士景泰六年以內閣太子少師出任天順元年謫戍

趙榮 陝西通渭人生員天順元年任五年以軍功兼支大理寺卿俸七年卒於官廕一子錦衣衛僉事

白圭 直隸南宮人進士天順七年任成化二年遷兵部尚書加太子少保卒贈少傅謚恭敏

土復 順天固安人進士成化二年以兵部尚書調任加太子少保十六年致仕卒贈太子太保謚莊簡

劉昭 陝西邠州人進士成化十六年任加太子少保二十二年遷戶部尚書加太子太保

李裕 江西豐城人進士成化二十二年任本年遷吏部尚書

謝夔 江西新建人狀元成化二十二年任二十三年卒贈太子少保謚文莊

賈俊 直隸東鹿人鄉舉成化二十三年任加太子少保弘治六年卒

劉璋 福建南平人進士弘治七年任加太子少保九年致仕

徐貫 浙江淳安人進士弘治九年任加太子太保十三年卒贈少保謚康懿

曾鑑 湖廣桂陽人進士弘治十三年任正德二年卒贈太子太保

李鑑 河南湯陰人正德二年任三年致仕

洪鍾 浙江錢塘人進士正德四年任本年遷刑部尚書兼左都御史加太子少保卒謚襄惠

才寬 直隸遷安人進士正德四年任本年改兼左副都總制三邊軍務

畢亨 山東新城人進士正德四年任五年致仕

李鑑 詳前正德五年再任加至太子太保十六年致仕卒贈太保謚恭敏

林俊 福建莆田人進士正德十六年起任奉改刑部尚書加太子太保

陶琰 山西絳州人進士嘉靖元年任加太子少保尋改南京兵部尚書加太子太保

趙璜 江西安福人進士嘉靖元年任六年致仕

章瑞 四川犍爲人進士嘉靖六年任七年致仕

劉麟 江西安仁人進士嘉靖七年任八年致仕卒諡清惠

章拯 浙江蘭谿人進士嘉靖八年任九年開任

蔣瑤 浙江歸安人進士嘉靖九年任加太子少保十一年丁憂

趙璜 詳前嘉靖十一年再起未任卒贈太子太保諡莊靖

聶賢 四川長壽人進士嘉靖十一年起未任改刑部尚書加太子少保

秦金 直隸無錫人進士嘉靖十一年任十四年改南京兵部加太子太保卒諡編敏

林廷楫 福建閩縣人進士嘉靖十四年任加太子太保十六年致仕卒贈少保諡康懿

甘爲霖 四川富順人進士嘉靖十五年任提督工程十六年開任

溫仁和 四川華陽人進士嘉靖十六年任十七年改禮部尚書兼學士加太子少保

毛伯溫 江西吉水人進士嘉靖十六年提督工程十七年遷兵部尚書加太子太保

楊志學

湖廣長沙人進士嘉靖十七年任本年遷刑部尚書

周徹

湖廣九溪衛人進士嘉靖十七年任提督工程本年降左侍郎

蔣璠

詳前嘉靖十七年再任十九年致仕卒贈太子太保諡恭靖

張鶴

山西臨汾人進士嘉靖十九年任二十年丁憂起南京吏部尚書卒諡恭簡

甘爲霖

見前嘉靖二十年再任加少保二十五年致仕

顧璠

應天上元人弘治丙辰進士嘉靖二十年任本部尚書督工承天不任部事

樊繼祖

山東鄆城人正德辛未進士歷兵部尚書嘉靖二十一年起工部尚書採木被劾未任

王以旂

應天江寧人進士嘉靖二十五年任二十六年改左都歷兵部尚書加太子太保

文明

江西萍鄉人進士嘉靖二十六年任

李士翺

山東長山人嘉靖癸未進士二十八年任歷戶部尚書

胡松

直隸緒谿人正德甲戌進士嘉靖二十九年任三十年致仕

歐陽必進

江西安福人正德丁丑進士嘉靖三十年任加太子少保三十二年丁憂

吳鵬

浙江秀水人嘉靖癸未進士三十二年任改吏部加太子太保

趙文華

浙江慈谿人嘉靖己丑進士三十五年任太子太保加少保三十六年閑住

歐陽必進

兄前嘉靖三十六年由刑部尚書改任屢加少保兼太子太保改都察院左都歷史部尚書

雷禮

江西豐城人嘉靖壬辰進士三十七年任累加少傅隆慶元年致仕

朱衡

江西萬安人嘉靖壬辰進士隆慶元年任出督河漕加太子少保五年再任

郭朝賓

山東汶上人嘉靖乙未進士萬曆二年任六年罷

李幼滋

湖廣應城人嘉靖丁未進士萬曆六年任八年罷加太子少保

曾省吾

江西彭澤人嘉靖丙辰進士萬曆八年任十年加太子太保尋罷

楊

巍

山東海豐人嘉靖丁未進士萬曆十年任

楊

兆

陝西膚施人嘉靖丙辰進士萬曆十一年任加太子保十三年加太子太保十四年養病卒贈少保

何起鳴

四川內江人嘉靖己未進士萬曆十四年任提督工程十五年回部管事尋侍養

石

星

直隸東明人嘉靖己未進士萬曆十五年任十六年加太子少保十八年陞戶部尚書

曾同亨

江西吉水人嘉靖己未進士萬曆十六年由提督工程左侍郎陞尚書十八年掌印

工部尚書行實

李慶字以善順天府順義縣人洪武末年以縣學生員入太學會文廟靖難以潛邸知遇特命署都察院右僉都御史事本年補浙江紹興府知府永樂元年召爲刑部右侍郎剛直敢爲不畏強禦未幾以憂去起復改都察院左副都御史理院事遇事有未便侃侃爭論甚爲文廟所眷注七年十一年十五年十八年車駕巡狩北京俱命扈行在工部尚書十九年定鼎北京命兼署兵部事未幾改兵部尚書詳兵部

金純字德脩直隸鳳陽府泗州人洪武中歲貢入大學需用三十年吏部尚書杜澤愛其才薦權吏部文選司郎中持衡公平

能聲益著三十一年出陞江西右叅政值久雨江水泛濫民多
澇饑多方賑恤民賴全活壬午 成祖入正大統吏部尚書塞
義首薦之召爲刑部右侍郎永樂初將營北京命往湖廣採大
木規畫綜計惟恐耗竭國脉務禁奸會稜漁於是各郡不聞騷
擾而事亦易集還京甚荷 成祖眷注七年 車駕巡狩北京
特命扈從及八年北征又命純同學士胡廣諭德楊榮金幼孜
扈從三月 車駕蚤發凌霄峯純等四人失道 上命中官傳
旨追尋得之 上大喜慰問良久五月至驢駒稍逼賊境凡居
中翊贊効勞居多胡冠平扈還南京尋陞刑部左侍郎九年命
看視河勢先是洪武元年用兵梁晉間大將軍徐達開塌塲口

入於泗以通運道後因河口壅塞淤乃修師家莊石佛諸閘又
開濟寧州西耐牢坡接引曹鄆黃河水以通梁晉之粟後故道
復塞至是命純發河南運木丁夫開濬故道自開封城北引水
下達鄆城復入魚臺場場口出穀亭北十里以修 太祖時故
事今所謂永通廣運二閘是也十年回京十四年改禮部左侍
郎尋陞禮部尙書時禮部有呂震掌部事凡一切大典禮慶册
祭禱等儀俱命純攝行之十五年又扈巡北京於行在諸典制
俱諳習切中事宜十六年扈還南京十八年又扈從行在十九
年定鼎北京奉 勅巡撫四川地方考察官吏安輯軍民於歲
害地方者惟去其大甚不毛舉細索蜀人無擾及事竣還京與

尚書呂震協理部事雖震有柔佞才而純以誠心處之終無間阻二十二年改工部尚書本年冬改行在刑部尚書詳刑部黃福字如錫山東萊州府昌邑縣人永樂乙酉調北京行部丙戌朝廷以安南土酋僭號弗聽興師問罪福承命先詣兩廣營辦軍需處置有方應期而集是年冬師渡富民江賊卽散遁明年夏渠魁就俘遂郡縣其地復古輿圖設三司控制其土命掌布政按察三司事初附夷民雖或叛服不常福撫綏有道以是有變無虞時總兵英國張公輔黔國沐公英遇有機務必與計議福亦莫不盡心夫爲二公禮重福自膺重寄惟知有朝廷而不知有身廉明正大遇事有爲不阿鎮守內臣多不悅誣

奏福亦具奏陳情 上素知福遂寢其事 仁宗卽位驛召還
京父老不忍舍去泣送於塗者何啻千萬人至遮道不能行及
抵京仍爲工部尙書兼詹事府詹事賜以白金彩幣 賜誥命
褒崇推恩及其祖考洪熙乙巳扈從 東宮至南及回 上賓
天 宣宗嗣登寶位命董獻陵事賜資優渥旣竣事以久違先
壟素乞歸省 上允之賜以路費馳驛而回未逾月復召還京
嬰疾 上遣醫護命中使錫以珍饌疾愈持節寧府行冊封禮
適交趾警報及掌二司事兵部尙書陳洽累疏乞福復鎮遂驛
召還京 上命仍領布政按察二司事累官南京戶部尙書詳

南京戶部

吳中字司正山東東昌府武城縣人洪武戊寅自國子生授營州後屯衛經歷陞大寧都司經歷成祖義旗所舉師至大寧中以衆出迎其體白潔豐偉應對明暢上一見拔於羣衆中賜襲衣命守會州教士卒力田南兵攻城率衆卻之移守薊州捍禦撫綏具有方略賜衣服器物以嘉獎之命署北平布政司理問尋陞本司經歷給饗運贄城守竝効勞績成祖入正大統改元永樂以功陞大理司丞是歲旱蝗具言此由刑濫所致皆臣等之過乞戒飭法司務寬平無幾陞少卿以發奸慝陞都察院右都御史五年將營北京宮殿改工部尚書奉命取材於蜀還又命董餉運北京賜帛六百疋八年車駕北征命扈

從兼督餉運十二年還京丁內艱歸十四年奪情起復仍命
宮殿營繕中言營繕吉事臣喪服未除非所當預改刑部尚書
後十九年以言事忤旨逮繫二十二年仁宗皇帝嗣位尤見
信任陞太子少保仍掌刑部兼詹事府事賜寶帶金織衣踰月
仍改工部尚書宣德元年坐累解太子少保中事三聖皆見
信任凡車駕行幸不以遐邇皆在扈從三陵之建皆董役竣事
皆有銀幣之賜英宗嗣位以耆舊復少保時營三陵及重建
奉天華蓋謹身三殿乾清坤寧二宮并京城俱命董之早暮勞
勤致疾正統六年功成陞少師賜金帛文綺加繡麟衣七年卒
年七十一計聞遣禮部尚書胡濙賜祭追封荏平伯賜諡榮襄

命有司治葬官其子賢世襲錦衣衛百戶中爲人和易閭爽勤於奉公其掌刑憲寬厚平恕恒躬視獄中命除穢惡疏桎梏時食飲戒飭吏卒以時寬恤迨遷冬官職務填委規措經畫條理井井心之默識雖久不忘襟度有容雖忤不較或屈已伸謝愛護僚屬恒護庇其短有佐在南京嘗賦造海艘材於江西浙江江西加數十倍時論謹譁中聞駭愕遽奏罷賦悉給於公屬官有器能者率獎進之先事蓄材以應時需隨用皆足未嘗缺乏自正統來京師多大營建悉出公家有司不知百姓不聞多預贊畫明於燭奸嘗四鼓入朝道遇負鈔數十萬緡者中曰非寇而何命從者悉繫以奏詰之乃造鈔匠盜寶鈔提舉司鈔遂置

于法邂逅有見必上聞不以出位爲嫌歷事四聖皆承厚
遇所得賜賚時鮮與擬宣德中賜銀章其文曰和敏詳達蓋以
貺其行云所得書詩圖畫尤多自念久病奏乞停祿不允家居
事親孝敬常迎就養京師備極崇奉親歿致御祭之榮永樂中
命大臣之子入侍皇太孫乃推於其弟雖位貴待姻戚鄉黨
相與欵洽如布素時賙窮恤匱不問識與不識與人處謙和怡
愉故大官中貴皆樂親其有容云

李友直字居正直隸保定府清苑縣人讀書通太義兼習律法
成祖文皇帝舉義靖難之初友直時從事北平廉司首發密事用
是深契宸衷遂擢藩司叅議贊翊居守摠誠効勞禦敵之方扞

城之具罔不周備永樂紀年肇建北京設行部除左侍郎尋以
事謫戍四年復原職及營宮宇承命綜理沿河輸運諸務悉心
殫慮雖隆寒盛暑不替利興害去人咸德之十八年竣事調行
在工部十九年定鼎北京命署兵部事二十二年九月以居

大行皇帝喪不齋戒公宿降順天府丞尋陞工部右侍郎仁宗
嗣位追念舊勞拜工部尙書未幾改北京行部奉命代祀秦中
前代陵寢還朝懇懇以軍民利害爲言深承眷遇宣廟繼統
改行在工部命往西蜀總董夫匠鳩工料材寬不至縱嚴不至
苛軍民便焉自是凡有營建一以董督之任委之友直夙夜敬
慎撫循慰勞人忘其勞而事必就英宗臨御屢勅繕葺京倉

及濬築通濟等河施設措置智力弗衰正統戊午九月以疾卒於官

王禔字

陝西鳳翔府郿縣人永樂末年以舉人入太學宣

德初年授蘇州府同知朴實謙和士民宜之以治績陞應天府治中涖事勤慎有爲吏部尚書郭瑾薦陞山東左布政使在任不聞風跡而持身無玷與民休息正統六年進工部左侍郎值右侍郎王佑諂附太監王振險邪無恥日以公物相送禔亦懼禍同衆旅見習以爲常及吳中卒正統八年遂陞工部尚書代中掌部事一切營建多主於振工料物價多破中貴侵寇如水去隄防不能裁抑於十一年致仕

石璞字仲玉河南彰德府臨漳縣人永樂庚子鄉貢入太學初
爲監察御史遷江西按察司按察使以失匠降副使七年陞山
西右布政使正統十年轉左十一年進工部尚書戊辰河決滎
陽經曹濮至陽穀入漕河潰沙灣東隄入於海命璞治之河決
口塞明年己巳浙江處州盜起命璞討平之景泰辛未也先寇
獨石命璞兼大理寺卿往璞充餉勸兵修垣守險 康定帝賜
爾書曰爾忠勤善謀素爲邊人信故命爾事平進太子太保六
年改兵部尚書詳南京都察院

江淵字世用四川重慶府江津縣人天資明英才學充裕中宣
德庚戌科進士時 上欲選進士之尤者使績學 勅禮部尚

書胡濙選年少質美者三十人入試 上在齋宮親授題曰用
人何以得其方 命楊溥掄次得三山薩琦與淵等八人與列
詔賜襲衣冠帶有司給燈油房屋皂隸 命太和王直率之讀中
秘書正統元年績成授翰林院編修十年乙丑同考會試尋陞
侍讀十二年選入東閣進學士十四年陞刑部右侍郎土木之
變徐有貞倡議南遷被太監金英扶出淵問之徐曰吾主南遷
不合矣淵入昌言固守之策遂見稱賞會虜至京城西北關外
都督孫鏜營於城西 命淵叅其軍及虜退尋改戶部右侍郎
兼翰林院學士入閣典機務景泰元年大理寺丞薛瑄乞致仕
淵上疏留之以慰人望二年命主考會試本年尋命巡視淮徐

諸郡淵條奏三事一淮之常盈徐之廣運諸倉俱在城外宜築
月城以守之一天津爲北河之會鳳陽爲中都之會宜放操軍
以守之一河南爲中原之要地北平爲京師之巨甸宜選民兵
以守之疏上 命所司議行三年與易儲事加太子少師仍兼
前職七年丙子春于少保病在告 上諭旨內閣求一人協同
之時淵在內閣每爲同事者沮抑常垂涎代于諸閣老窺知其
意謂之曰兵權任不輕非江先生不可淵欣然不辭明日 旨
出調淵補工部尚書大恚失望明年 英廟復位與陳循輩俱
謫戍鐵嶺後石亨敗復其官淵清勤簡靜善文詞所著有觀光
錦榮鳴玉全生休休子等集

趙榮字

陝西鞏昌府通渭縣籍福建福州府閩縣人正統

中以楷書生員授中書舍人直文淵閣素有膽略遇難不避正
統十四年八月土木之變 英廟北狩 景帝嗣位尊爲 太

上皇十月初虜酋也先入寇初十至京師連日抄掠總兵石亨
等與之殺傷相當其酋長鐵頭元帥死焉虜少沮復遣使言欲
和時虜情叵測選使虜者多規避不敢行榮毅然請往太學士
高穀嘉榮之奮忠卽解所束金帶與之十八日陞榮鴻臚寺卿
同通政叅議陞禮部侍郎王復持羊酒往也先及其弟伯顏帖
木兒掇甲冑屬弓矢 太上帶刀引榮同復等前露刃夾之榮
與復等拜訖也先指却羊酒取勅是番字 太上取勅是漢字

也先謂榮等是小官索大臣于謙王直胡濙石亨等出迎榮同復辭歸 太上諭二人曰彼無善意汝等宜急去二人方回而虜騎四面標掠會四方援兵漸集虜夜遁榮還仍入文淵閣景泰元年六月也先以屢使議和不成俾其知樞密院阿剌爲書遣其叅政完者脫歡等來 上疑其詐召文武羣臣議皆議禮宜迎復虜縱以詐我當推誠 上允遣禮部侍郎李實大理寺少卿羅綺指揮馬顯與脫歡等至虜營七月又議遣右都御史楊善爲正使榮爲副使榮復議行不辭陞工部右侍郎同虜使平章皮兒馬黑麻同知哈番等下番議和善等使虜不持一緡以口舌曉譬國威不屈遂得回鑾衆謂是行也楊善忠義發於

言詞應對不窮有以陰折克惡實爲功首而榮奉侍之勇其氣亦足尙云還京轉工部左侍郎天順元年 英廟復辟尙書江淵下獄謫戍進榮工部尙書時文臣盡行貶斥榮以使虜受知于一上雖石亨曹吉祥表裏擅權爲奸榮朴實知義不入其黨五年曹欽謀不軌犯闕殺都御史寇深錦衣衛指揮使逮臬榮披甲躍馬呼於市曰好漢皆來從我曹家是亂臣賊子當共剿殺我輩是忠義臣士不可退避於是從者數百人同孫懷寧鏜提兵襲欽於陣前鼓舞獎勵士卒滅賊須臾事定以功命兼支大理寺卿俸一日 英廟謂大學士李賢曰今六部尙書庶皆得人但慮吏部王翱老矣如戶部年富不易得惟禮部石琚稍

弱又曰刑部陸瑜甚佳都御史李賓亦可如工部趙榮亦能辦事賢曰此人可取且如曹賊反時文職皆畏縮逃避況兵非已責誰肯出前惟榮自奮呼衆滅賊成功如此存心行事人莫能及 上曰是亦忠臣七年卒於官廕一子錦衣衛指揮僉事

白圭字宗玉直隸真定府南宮縣人正統壬戌進士授監察御史歷官兵部右侍郎天順三年虜寇陝西命贄戎務以捷還京七年工部尚書員缺 帝意屬圭執政者欲舉所知託以歷淺爲言 帝曰卿所舉乃方岳爾白圭由方岳歷都憲至此不可授乎卒授之 憲宗卽位幸大學耕籍田開 經筵皆預侍

裕陵營造承天等門修建董役俱有犒賜荆襄賊嘯聚推劉千斤

石和尚爲主收元岩僞軍師總兵等號攻劫州縣 上命撫寧
伯朱永總兵圭提督軍務往討之至南陽分兵爲五路圭與撫
寧由南漳入遇賊誘之臨城擊破之乘勝進兵賊退入巢穴山
險復雨淖恒先士卒而登至格鬪賊憑高爲拒時諸路兵會已
二日攻之不能下士卒聞圭來各奮身乃命裨將率卒千餘由
間道出賊後焚其營而自以大軍臨之賊萬餘迎敵傾其營火
遂驚駭蹂亂走死者無數斬首數萬級生擒戮千斤等獻俘京
師適聞父喪乞守制不允特歸葬事論功加太子少保陞從一
品俸調兼兵部尙書驛 召至勅不妨部事提督十二營操練
卒贈少傅謚恭敏初圭任浙江布政過徐州洪家人與水手相

毆工部主事袁規收其儀仗懇請而解未幾召爲工部尙書袁不自安而圭未嘗形於辭色人服其量餘詳兵部

王復字初陽順天府固安縣人正統壬戌進士擢刑科給事中謹厚識大體十年通政司缺官以奏對洪亮特陞左叅議十四年土木之變英廟北狩景帝嗣位尊爲太上皇十月虜

酋也先入寇紫荆關入殺指揮韓清等孫祥走死初九日虜至京城西北關外石亨等營於城東兵部尙書于謙督其軍都督孫鐘營於城西刑部侍郎江淵叅其軍交趾舊將王通爲都督鴻臚卿楊善爲副都御史守城虜攻城連日抄掠亨等與之殺傷相當其酋長鐵頭元帥死焉時幾旬降附胡人留居者多乘

時爲寇 朝廷重賞購捕被獲者累日不絕虜時少沮復遣使
言欲和十七日以復爲禮部侍郎中書舍人趙榮爲鴻臚寺卿
持羊酒往也先其弟伯顏帖木兒擐甲冒櫛弓矢 太上帶力
引復等前露刃夾之復等拜訖也先指却羊酒取勅是番字
太上取勅是漢字也先謂復爾等皆小官可令胡濙王直于謙石
亨楊善等來復辭歸時四方兵漸集虜夜遁從居庸關出遺所
掠人口牛羊於路以緩追兵復使還仍理通政司事天順元年
英宗復辟改兵部右侍郎四年轉左成化元年陞兵部尙書時邊
患漸興衆議戎政非其所優特改白圭爲兵部改復爲工部尙
書加太子少保在部謹法識體又善節縮財料止無名之役聲

名勝於在本兵時有中官怙寵市恩以結人心騰驟左右等四
衛勇士小廝及養馬軍奏乞悉給以胖襖袴鞋事既下該部疏
止之兵書余公子俊謂復曰府庫衣袴之富如此先生何議不
及此恩出斯人乎復曰 祖宗之制邊方有警應調京軍出征
則以此給之使其不勞縫製得以克日起行京衛軍士則每歲
給散冬衣布花卽此物耳蓋以京軍守衛守城者無調遣之急
故給與布疋綿花使各軍妻各自縫製以省有司勞費此良法
美意之所在也今四衛軍士旣給以布花而又有以此加厚非
惟失 國家備非常之初意且使恩出內豎其於 國體胥失
之矣余公服其言又一國師病且死語人云吾示寂在某日某

時至期不死弟子恥其不驗潛絞殺之凡法王國師死中國者例該營造墓塔復奏言此僧平素受國賜資積蓄頗多宜籍以營造墓塔不須動支官錢糧人以爲得宜云十五年六科十二道都給事中張海等劾四方水旱皆復與戶書楊鼎南京兵書薛遠吏部侍郎錢溥四人妨政失職所致宜加斥罷俱不允十六年致仕卒贈太子太保諡莊簡

劉昭字克明陝西西安府邠州人景泰辛未進士歷通政司左通政成化十年陞工部右侍郎十六年進尚書時太監梁芳用事妖僧繼曉等各以秘術幸營建日與所費不貲昭不能裁抑執奏多徇其意加太子少保二十二年改戶部尚書加太子太

保致仕詳戶部

李裕字咨德江西南昌府豐城縣人景泰甲戌進士擢監察御史歷山東按察使陝西布政順天府尹總漕右副都御史協理院事進右都御史調南院右都御史成化丙午考蹟至京進工部尚書在部未久尋遷吏部尚書詳吏部

謝一夔字大韶江西南昌府新建縣人天順庚辰會試第三廷試英宗覽所對策嘉悅之擢第一大學士李文達公賢尤喜得人後有及第者輒曰安得偉器如謝某者乎除翰林修撰同庶吉士讀中祕書由是所學益博而精憲宗嗣統進侍經筵被賞賚預修英廟實錄據事直書得史官體三年同考會試

及實錄書成陞左春坊左諭德加賜銀幣繼續通鑑綱目時
預修者僅十有四人一夔分修元史凡所褒貶一依朱子書法
多正前史之謬十三年史成進御陞翰林學士宴賚有加尋命
主考南畿鄉試鑒別精明得士最多嘗因辛卯星變上疏陳五
事一正宮闈以端治本二親大臣以詢治道三開言路以決壅
蔽四慎刑獄以廣好生五戒妄賚以足財用言多剴切上怒
責之十四年戊戌皇太子出閣詔簡侍講讀庚子陞禮部右
侍郎凡制度儀文多所裁定前所未有者必稽經據史叅以時
制具爲儀注務使可行一時同事者咸推其練達二十二年遷
工部尚書政績卓然非迂腐者可比踰年以疾卒年六十三贈

國朝文苑英華卷之二
四六
太子少保謚文莊性樂易待人接物一本於誠未嘗有所忤故
人無貴賤咸愛敬之尤篤友誼有誤懼法網不能自白者必語
所司爲辯之或材可用而沉抑下僚者薦諸當道不幸客死爲
歸其喪或卹其孀又置義學以訓鄉俗子弟置義田義倉以賑
貧乏自少至老好學不倦所著述不爲奇崛雕刻之詞而溫厚
詳雅類其爲人有古源文集若干卷藏千家初從侍讀尹鳳岐
游尹語人曰大韶他日所造吾不及也吾於文學間見之矣卒
以大魁官學士位司空其言益信但在禮部失身李汝省不復
持重初都御史閔珪以江西多盜緣京宦佃戶窩聚占愆不發
乃奏欲併其主爰與尹直銜之調珪於廣西或問之一變曰珪

之謬也匪昔省李汝省密奏里閤其爲紅鷹乎以是人始知朝政紛更汝省之爲也而夔不免於匪人之比云

賈俊字

直隸保定府束鹿縣人景泰庚午應順天鄉試會

試不利入大學肄業需用吏部尚書王翱選科道專以體貌爲主推擢山西道監察御史居官廉慎謹飭不取非義錢在臺能振紀有爲成化中陞山東副使益倜倅自持不喜結巡察以炫聲名時年纔五十有六鬚鬢皤然不事淄飾清戎御史以其老而骯髒又因滿之入也將劾之一日正色問之曰賈憲副高壽幾何對曰犬馬之年八十之二矣御史默然既退回僚問曰何故不以實對俊曰渠以我老將劾我虛認幾歲以成其袖中彈

文之美不亦可乎大學士劉文穆公吉素重其爲人爲之延譽於朝十三年陞都察院右僉都御史巡撫寧夏在邊八年不挾妻子嚴明剛果決摘如神凡軍務區處無遺豪猾屏跡軍民豪富迄今父老稱不絕口二十年陞工部右侍郎二十三年陞工部尚書弘治初年因劉吉駕馭言官舉劾諸司上知內閣與言官交通之弊言官犯法不少借假御史李興巡按陝西用刑嚴酷捶死人命數多爲儀賓所奏論死廷鞫時劉吉欲暗邀人心密屬俊解之廷鞫畢奏覆上令處決俊倡九卿連章論救又會衆求救於壽寧侯張鸞得免死充軍未幾加太子少保七年致仕卒於家

劉璋字廷信福建延平府南平縣人幼失怙母翁氏居窮守節以撫教之稍長卽知奮勵以力於學舉天順元年進士拜戶部主事璋器度溫雅而復濟之以廉勤恭慎大爲部堂諸卿佐所稱許遷本部郎中成化年歷山東布政司左右叅政時歲方歉且疫璋與司官三人分道賑恤其二人者相繼染疫以死璋盡心竭力往來經理於其間弗倦亦弗憚也又歷浙江左右布政使浙雖號大藩然諸郡倉儲甚少璋通融一省歲計損多益寡支吾目前之外尚欠米二十二萬石邊海軍士月糧停支皆欲棄伍赴省陳告璋聞之曰此輩一行動以千百計而無有統領之者恐貽患地方亟遣人告之曰錢米區畫已備早晚卽支

給矣敢有擅離部伍者罪不輕貸時巡撫都御史王恕積貯各處餘糧價銀計數萬兩璋徑支二萬五千兩散折軍士月糧然後移文巡撫請受擅支之罪巡撫亦當時名卿知其無他不之罪也又奏諸郡歲輸戶口食鹽鈔乞令照依時價輸米或銀以充軍儲上允之又以各衛屯田餘糧舊制俱各支給官吏月俸及軍士月糧第因其掌於都司督於憲司遂無有稽考其數者故皆有名無實璋處之有方至是始得~~知~~制合前後三項共得米二十八萬石除補足歲計外又餘六萬石其他惠民之政類此二十二年擢都察院右副都御史奏勅總督漕運將行浙民不忍捨因留其靴以識去思璋督漕時河南數州饑饉戶

部主事張倫上言宋之漕運黃河以達於汴今宜倣此法漕運
河之米往賑之有 旨命倫督運十萬石璋督運十七萬石倫
蓋不知宋之漕運江不入淮淮不入汴以黃河之險非江淮之
舟所能濟也璋乃造巨艘而高大其帆檣募習黃河之水者操
之通運二十七萬以行尋復奉 勅巡撫鳳陽等處既而湖廣
鄖陽流民嘯聚 朝廷恐其滋蔓特 勅璋往撫治之先是其
境蝗蟲爲災民憂無計有夢神人語之曰巡撫公至則蝗自殄
矣及璋入境大雨如注蝗盡投水死爰老歡呼走告璋笑曰此
天活汝我何德焉繼又奉 勅巡撫四川等處四川亦乏糧儲
時有例許農民入粟補吏璋命有司聽其納粟且減其數旬日

間得銀萬餘兩而至者益多隨給以平糴歲足軍需仍餘米八萬餘石前播州宣尉楊輝鍾愛其庶長子友爲請於 朝特置安寧宣撫司而以友爲宣撫又築城堡以居之其後友又謀奪嫡因誣 奏其弟襲宣尉曰愛者有不軌之謀而愛亦許友以不法重事 朝廷遣大臣勘覈得其罪狀有 旨革罷友宣撫并其家屬發保寧府安置璋以爲安寧道路險遠城堡堅固友之弟敏及其所親附天家仲家士兵素好驍勇而其親屬又有爲之謀主者萬一負固不服而連結其黨與伊叛則不免爲地方之害乃闕其所奉 詔首先遣友所親信者二人請安寧慰諭友家屬謂巡撫以宣撫遠出其弟年少特遣吾二人者護其

印信以防外侮又遣能幹士官數人各領士兵分截安寧所出
入之路又榜示天家仲家諭以逆順禍福又樹榜通衢懸重賞
以購爲楊友謀主者區畫既定乃宣示詔旨遣官詣安寧收
其家屬印信而發遣之其處事精審類如此尋復奉勅省刑

有僧如方者被誣人命法司以坐其徒月滿璋訊知其寃密逮
如方詢之果然乃並出之時得平反免死者凡四十餘人弘治
元年遷工部右侍郎改戶部右侍郎四年陞左尋陞南京禮部
尙書在部清慎待屬以嚴不假色笑六年監生宋昇徃悍不服
朴責大詬而出祭酒聞於璋璋曰風化之地豈容姑息以壞士
風行法司奏請治罪該禮部備查事例議得宋昇兇濫有累監

規刑部問擬違制杖九十正與充吏例同欲將昇送部照例

施行上是其議七年尋召爲工部尙書其在朝廷議大政

決大疑公平直諒未嘗少有所屈在工部時每朝廷有所營

一建得璋委曲匡救而省免者甚多弘治九年以老乞休致上

勉畱之疏三上乃允特加太子少保給驛舟以還仍命有司歲

給俸米人夫優寵備至蒞官四十餘年喜怒恩威皆因其人未

嘗有毫髮容心於其間故一時賢士大夫咸推重焉家屏絕戶

外事惟觀書以自樂尤好吟詠然亦必本於性情關於風化而

不苟作也年八十三卒朝廷遣官祭葬恩寵隆備云

一徐貫字從道浙江嚴州府淳安縣人天順丁丑進士四年授兵

部職方司主事成化二年陞職方司郎中四年省親丁憂七年
起復補武庫司郎中八年調職方司郎中十一年陞福建右叅
政十三年丁憂十七年起復補原職二十一年陞福建右布政
使二十三年陞山東布政司使弘治元年陞都察院右副都御
史巡撫遼東地方四年陞工部右侍郎六年陞本部左侍郎九
年陞本部尚書十一年加太子太保十三年卒於官贈少保諡
康懿

曾鑑字克明湖廣郴州桂陽縣人天順甲申進士成化元年授
刑部江西司主事 年丁憂 年起復補都水司主事本年因
多餘官改吏部驗封司主事十一年陞稽勳司員外郎十四年

陞驗封司郎中二十二年陞騰黃右通政弘治三年陞太僕寺卿五年陞工部右侍郎管易州山廠九年陞工部左侍郎理部事十三年陞工部尚書正德二年卒於官贈太子太保

李鏊字時器河南彰德府湯陰縣人成化辛卯年二十有五舉鄉試明年壬辰舉進士廷對以純字獻策 憲皇初政精嚴鏊

願其終與吳文定八人俱宜鼎甲莫適次也太宰姚文敏公曰曷以省試名次之遂首省元列二甲之六是後多用爲例丁內艱甲午授都水主事管河治臨清改作板閘易元之朽而泄水者又緝內使私鹽十萬引沒官丁酉改戶部丁外艱甲辰除刑部晉員外郎郎中奉 命賑山西饑民多活人流民爲盜者之

宿論遣還本土開渠灌田萬頃民刻石頌德晉鴻臚寺少卿諫
罷鄧常恩陰職及毀山西戒壇聚游手溷男女者又數上言便
宜太宰王端毅公恕賢之再擬巡撫內閣劉文穆欲用其黨且
怨王公思濟之故沮不果弘治乙卯晉南京太僕寺少卿丁巳
晉光祿卿削冗濫之奉抗章數工部苟具器用耗財無益庚申
進工部右侍郎辛酉虜入榆林大掠上出六軍逐之命兼憲
職治餉虜遁還朝言十事而謂外攘宜先治內今盛齋醮嗜
燕遊寵他技以雜金紫畜異禽以療梁肉此好漸長恐顛正道
遠人偵伺以順逆邊方觀示以勤惰癸亥往山東視漕上言堦
城之壩毋毀沈河之塞毋通浚泉疏水漕利可復又請祀尚書

宋禮俱報可甲子邊臣奏密雲將有虜宜備之上命懿往召

至榻前諭旨懿至邊首簡將次廣儲乃治壁壘飭器械守險隘

梁溝澗開荒田舟河流罔不備具上謂司馬大夏曰懿果善

幹國者乙丑夏武宗卽位懿還命作泰陵丁卯進工部尙

書值劉瑾用事踰年戊辰致仕庚午秋瑾誅魏彬掌司禮監印

奏起掌工部壬申加太子少傅四辭乃允其第二狀曰德稱位

者安寵踰分者危公論宜之則榮衆指疵之則辱君之於臣在

遂其忠母徒溢其秩聞者取之然是後佞幸益雜修建大繪齋

山之戲內供之供造軍器於南織緡綺于蘇公漁邗課私責民

償內外繹騷中原起盜豹房僧寺鎮剛延壽疑翠太素知彈刻

畫色累金碧文石采瓦窮麗極奢鑄曲意徇之不敢裁執癸酉
加太子太保甲戌內宮災新作之值他役並興具疏曰漢文之
賢罷露臺而著隋帝之敗開汴河而致益民之所致惟財與力
力竭則懟財散則叛今無徵矣顧可又促之屢請姑停他營併
成內宮 上或奪俸示譴或間從一二幸閹劉養以太監監各
工鑄與議不協而叱之養泣懇於 上乃直鑄不究辛巳 皇
上卽位改元嘉靖七十有五致仕歸八年春秋祀墓外靜坐觀
書不出戶庭不燕飲無音樂蓋性節約老不渝云戊子以疾終
年八十有二卒贈太保謚恭敏鑄有心思計籌量物平價擇舊
成新但工役繁興與奄豎相比積貲成富被盜劫掠捕獲皆官

銀而不敢認識者惜其有才無守云

洪鍾字宣之浙江錢塘縣人成化乙未舉進士授官刑部主事
庚子陞員外郎仍領諸司事癸卯丁內艱丙午起復陞郎中尋
慮囚山西弘治己酉陞江西按察副使癸酉陞四川按察使丙
辰入覲陞江西右布政使丁巳轉福建左布政使歷都察院
右副都御史巡撫順天等處兼整飭薊州諸邊備乃建議增邊
墻自山海關直抵居庸延垣千餘里繕復城堡二百七十悉城
沿邊諸縣官無浪費而民不知勞自是緩急有賴又奏減防秋
官兵六千人歲省輪輓犒賞之費以數萬創建浮橋於通州以
利病涉毀永平陶窰以息軍民橫役之苦奪民產及牧圍草場

之侵於權貴者而悉還之遠近大悅改雲南巡撫再改貴州頃
之召還督理漕運兼巡撫鳳陽諸處正德丁卯陞右都御史
仍董漕政戊辰命掌南京都察院事尋陞南京刑部尚書已
已改北京工部復改刑部兼都察院左都御史詳都察院

才寬字汝栗直隸永平府遷安縣人成化戊戌進士初任陝西
西安府知府惠民禮下晝接訟牘夜則飲宴遇事裁決如流皆
談笑應之有民失金於食店急白寬寬仰見鷹飛又有蜘蛛墜
案曰店中必有姓朱名英者得其金詰得其人果出金以給失
者至今謠曰才寬斷朱英及去民慕之後正德二年以副都御
史巡撫甘肅地方自許襄毅經略哈密以後號稱無事及正德

初曹元繼之結黨逆瑾偷處恬逸無復宿謀於是奸孽漸萌官
任情裁決綜理未固三年改撫陝西條彙初立尋遷刑部左侍
郎未任復改兵部四年陞工部尚書俱踰季而遷會楊一清忤
逆瑾養病命以本官兼副都御史總制陝西三邊軍務詳二邊
總督

畢亨字嘉會山東濟南府新城縣人少遊庠校讀書學問負經
濟志成化甲午領鄉薦第二明午登進士戊戌授吏部驗封司
主事乙巳陞本司員外郎丙午陞本司郎中弘治庚戌改考功
司辛亥陞順天府丞甲寅奉命捕蝗忤權貴爲所中傷孝
廟察其誣宥之七年時諫垣有躁進者素嚙之且欲得其缺以

次遷補遂乘隙劾之調兩淮運同知九年陞副使趙鼎宿於
鹽船屯集處驗計糧斛之數織牌幟以次請所稱擊弊用以除
適開中鹽引五十萬權璫李家僮競先自占三之一亨曰利均
則鹽法行渠先得此如後來鹽引何時李勢焰薰赫人皆爲危
之不聽鹽法御史委鞫真州所鹽乃突至稱驗之無他益加敬
服東山青谿二公素慎許可時被召入朝語人曰一路好官惟
畢運使耳十二年轉湖廣右叅政淮人爲碑去思贈言者有瓊
花觀裏長廊下千古清風滿素碑之句武靖苗賊構亂督餉贊
畫功多 詔賜彩帛十三年轉浙江右布政使先是歲造官段
二萬貯司年久避咎莫敢驗解毅然當之咸嘆其難浙中饑山

內帑賑給既有飛語中傷者事白而清操愈厲矣十五年改陝西左布政使未任陞都察院右副都御史巡撫甘肅閱士伍出匿占三千人又簡丁餘爲邏卒莊浪有警踰時城晝閉乃率師直抵城下開門屯師於郊令士樵牧有餘芻富給賞以充儲峙軍威大振虜遁去十八年太淑人與安陽公相繼歿遂以憂去公歸治喪軍士泣送之曰公去我輩不獲生矣上聞遣官諭祭命有司營葬事以爲二親榮正德二年服闋陞南京工部右侍郎湖廣河南災命兼右僉都御史巡視至其地區畫無遺策境賴以寧比還當改兵部時逆瑾欲引鄉人謂吏部曰此人性剛不宜此任四年仍改工部尋陞尚書五年庚午有玉帶之賜

未幾瑾敗上其不法事請釐革誤及請封立祠例遂得罪罷歸
亨才識過人敷歷中外所至赫然有聲初爲驗封主事巡南城
見一亡命曰此盜也一訊而服政少暇輒及經史爲員外郎時
常使淮府行冊封禮饋遺一無所受爲郎中時憲廟上賓
朝士有爲詩哀詠之者索和不答或問之曰哀悼不暇何以及
詩其識大體類如此其進尚書節財用嚴門禁省徵派杜請託
風裁凜然雖瑾之奸兇亦不爲撓既遂閒陶然無所芥蒂乃擇
子姓教之於有司事一無所預士大夫九服其高乙亥卒遺命
長子右副都御史昭等曰吾官惟有清白吾祖父以此傳家不
可改汝輩讀書要探見義理方是學不可苟也勉之我死後慎

勿煩瀆 朝廷求善祭言已而逝更不及他器識英邁好學多聞耿介正直之操出於天性平居接物有禮而嫉惡太甚以是被誣遭抑迄老不爲屈有古大臣風

林俊福建莆田縣人成化戊戌進士嘉靖元年起任工部尚書尋改刑部尚書詳刑部

陶琰字廷信山西絳州人成化辛丑進士授刑部四川司主事弘治元年陞山東司員外郎二年陞陝西僉事六年陞陝西副使十四年陞福建按察使十七年陞浙江右布政使十八年陞福建左布政使正德元年調山東左布政使本年陞都察院右副都御史巡撫河南地方二年陞刑部右侍郎闕任五年起改

左副都御史總督漕運兼巡撫鳳陽等處地方六年陞南京刑部右侍郎七年陞都察院右都御史巡視浙江地方九年仍改總督漕運兼巡撫鳳陽等處地方十年致仕十六年仍起原職照舊總督漕運本年改戶部尚書兼左副都御史仍任前職嘉靖元年遷工部尚書加太子少保本年改南京兵部尚書詳南京兵部

趙璜字庭實號西峯江西吉安府安福縣人五歲失恃卽英發有巨人志時父恒齋官蜀之黔江過石首舟觸漲濤璜墜水流半里許不溺兒者驚異十歲父補富順教諭就傅苑馬與公維嶽舉業日有造詣嘗讀書僧寺有賈懋佛殿遺一囊盡琥珀珠

物璜拾之踰時賈索囊驗實還之賈探囊以謝麾之而去幼治
詩經歸安福專治春秋作解願若干卷學者心服執經門下者
日益以衆成化丙午以儒士中鄉闈亞魁錄經義以式承學弘
治庚戌中會試第十一名登二甲進士援例歸省癸丑授都水
司主事督呂梁洪置夫數十半爲土豪隱占甚至侵偏署傍隙
地璜召至諭以法豪憚威革心無敢後者往來中貴餽送悉卻
之供應廩米之外蔬果不入迎恒齋就養秋毫皆出自俸資創
立義塚岸無露骼丙辰秩滿改兵部武選勵清操精選法吏胥
斂服罔敢售其奸戊午遷職方司員外郎遇例實授大司馬鈞
陽馬公極器重之遇重務每咨籌稱善草疏多出璜手薦堪大

用己未典會試文衡秉公竭明以得士稱庚午陞山東濟南府知府府有積年舞文爲政蠹守莫能制璜預選吏農性敏者教之法律親爲改格擬踰月得可役者二十餘人遂盡逐之宿弊犁然以革處同僚以和每救正弗逮或有變故者從厚周之遇屬官嘉善而矜不能作興學校誨以作文讀書之法士子成才科第倍昔辛酉甲子兩與簾外程文多出璜筆每遇旱災憂形於色積誠祈禱輒應乙丑郡人告蝗蝻璜曰此吾咎也修省額神限期蝗絕凡七年濟南無歉歲海豐有殺人而逸者誣逮者籍戍久之潛歸有司獲以解府璜察非其罪密使人緝得渠惡伏辜戍者獲釋撫按藩臬凡有大政疑獄悉以付璜如漢庶人

牧馬草場舊係屯田給佃於民息入官 王府屢行奏乞百姓

苦之數經勘處依違弗決璜竟歸於民民感念至飲食必祝鎮

守中貴舊蒞臨清欲移鎮省城以張威納賂璜白撫按以計寢

之而民獲安堵尋有二巨璫以選婚至郡皆憚璜弗敢肆虐徃

行無留獄府庫積銀至二十萬有奇廩粟三倍之冊載詳明無

毫釐爽後雖逆瑾查盤羅織竟不能中傷丁卯春陞順天府丞

瑾賁賂於璜弗得逮繫詔獄民號呼攀挽車不能前竟奪職歸

田里環堵蕭然瑾誅臺諫論薦 召復舊銜署京兆印治多中

貴及勢要田土有司不勝其凌逼乃懲其一二自是驕恣者屏

跡辛未陞右僉都御史奉 勅巡撫宣府地方有權貴擅監利

攬納軍儲事發奏逮數百人璜親鞫之置諸法逮者盡釋之壬申山東寇起廷議推調撫奉勅以行父老歡迎感動璜擇藩臬中賢能者分賑之脇從聽撫橫死者掩遺骼表節義以敦風化凡徭役徵輸悉曲計處之民困大甦會闕里災璜拜謁惻然力謀修理廟貌一新止鎮守巡歷所屬而革其歲取柴薪之值倖臣錢寧令家丁鬻鈔璜禁弗得售遣人偵之無可指者黃河退灘地數百里最爲沃壤璜令有司集流氓使墾爲田許復其業番僧怙寵奏乞起科充齋糧旗校肆威恐嚇有司莫能制璜以去就爭之得免乙亥黃陵岡河變運道幾危擢工部右侍郎兼憲職奉勅總理受命之三日卽趨河上躬率官民二

一月胼胝水勢稍退貽文河伯與共責任數日狂流壅沙護岸三
一婦告成人以爲神逾年白洋河口警報沓至奉命經略罷斥
曠瘼舉謀勇將領計捕權貴陰庇宿寇以戢內梗軍容於是整
肅設法賑濟活饑孥甚衆還朝佐理部事奉勅督運大木
一營建 乾清 坤寧兩宮設法并運省費不貲辛巳 兩宮成

辭錦衣世襲之蔭受飛魚麒麟金帛之賜 世廟踐祚迎扈

至河南還 賜羊酒膳饌嘉勞加俸一級具辭不允是年轉本

部左侍郎署部事 廷試充讀卷官奏毀鎮國府玄明宮并香

房酒店保安洪福諸寺院洎諸權奸廬舍以備 國用以紓民

力修濬城池街道溝渠以至宗人府詹事府國子監城隍廟凡

圯壞衙宇一新葺之京師改觀嘉靖壬午陞本部尙書侍經筵
明年仍充 廷試讀卷官工曹錢糧百需所在出入頻繁謾無
稽考璜令司廳四司各立文簿互相稽察宿弊釐革殆盡凡
朝廷有大興作皆自計畫裁損居多乙酉冬二品三載績奏 上
遣中官賜羊酒累沐 恩賜文獻通考敬一箴資治通鑑 御
製洪範序 獻皇帝睿筆皆一時殊遇也 世廟工成再領金
幣之賜議處營建 仁壽錢糧幾百萬皆取之府庫不徵派於
民天下陰受澤率類此然秉公持正多忤貴人意由是去志益
堅丁亥懇辭乞休荷 優詔褒榮仍給驛還鄉歲隸六名月米
五石全名完節士林高之明年遇恩例進階榮祿大夫璜切感

激 國恩惟焚香遙祝冀 聖壽無疆 前星早耀而已家居

凡五年臺諫累章薦起壬辰夏四月工部缺尙書特 旨下吏
一部起復任六月二十六日使及門璜捧檄流涕具疏以疾辭荷
旨卿耆舊老成已有旨起用宜卽前來供職不允所辭至七月十
一日竟以疾不起訃聞 命官諭祭營宅兆贈太子太保諡莊
靖年七十

閑述云正德中營建 乾清 坤寧等宮工部差郎中三員請

四川湖廣貴州三省分採大木侍郎一員總督俱領 勅行事

數歲木無運至至者又多空朽時永順宣慰彭明輔進大木五

百餘根皆堅實美材頭號圍一丈四尺三尺二號圍一丈二尺

一尺俱長四丈五丈不等共百餘根餘俱三號四號以下圍長丈尺不等至天津河涸水僅三四尺餘楠木沉重食水五六尺餘至張家灣十日之程一夫價費一兩近京地方公私空匱不堪起派自灣至神木廠陸路半日之程大車二輛併作一輛名雙腳車止運木一根索價七八十兩甚至人騾被壓卽死車戶往往逃避雖有關河淤塞難運工部差左侍郎劉永修濬費價千兩迄無成功在部及採木堂司等官俱停俸尚書李公鏊長大息而已予曰國初營建大木俱取於三省豈神運鬼輸乎予敢任其事明日李公對衆抗言差趙亞卿事罔不濟衆曰諾乃會議請勅差予提督運大木予乃議領天津三衛下班官

軍運木以蘇地方派夫之苦疏濬閘河運木以免僱車之費餘皆賞罰等項事宜議悉奉 欽依比至天津河涸木鉅有獻議者云取大剝船貫土其中壓之食水四尺許每船約二大木於兩幫橫施三楞木於上用纜箴結去土船起木隨以浮雖淺可行予從之又有獻議者云土遲以軍代之合散特一呼吸間予亦從之凡百餘船一日而就時順風驟作湧浪高至數尺船行甚速凡十餘日抵灣風止浪平木不可動人謀神力實兩濟之乃濬閘河凡修六七閘惟河口無閘水易傾瀉乃作一木閘俱有啓閉木由閘入凡數日抵神木廠拽入打截運入臺基廠造作於是工乃就緒所省公私夫車僱價不下數十萬兩濬河造

閩多出主事孔鳳之計事賴以濟子奏薦之 宮殿棟梁俱用楠木時三省近山屢經採伐無大楠矣惟遠山有之險阻不能出水必須採伐在山候霖雨降洪水漲衝出水次方可運也此木多歷年所諺云十楠九空有地空止下截空有節空止中截空若天空則上中下俱空矣一木採運不下千兩到京空朽不堪何辭以解以此在部及採木堂司等官俱被叅停俸予乃寓書三省委官備悉大木事宜自此木皆堪用官亦免罰不數年而 宮殿落成神木廠始有堆積大木前此所未見也惟司國計者因事納忠惜難得之材罷不急之工蘇困弊之民 宗社幸甚蒼生幸甚

又云正德中承天門外金水橋內水涸沙淤茂草生焉與闌杆
齊時朝參禮廢無濬之者嘉靖改元予以侍郎署部一日早朝
內閣楊石齋蔣敬所毛東萊與予議事及之謂當濬也予退而
具題 上命少監崔文同予督工 皇城內大小河溝通行疏
濬數月工完金玉河流通澄澈寢復舊觀具題 上命以都
城九門城河亦有淤塞之處命兵工二部會議疏濬予卽會兵
部侍郎李昆議動團營官軍數萬疏濬題奉 欽依甫下尚書
彭澤到任會團營內外提督太監張忠總兵郭勛議團營軍不
該動順天府行所屬州縣起民夫疏濬予聞之一笑彭曰何笑
乎予曰公耆舊重望文武全才郭張二公亦皆老成何議事乃

同兒戲耶彭曰各處修城軍三民七係是大例豈兒戲耶予曰公誤矣偏州小縣民多軍少故有此例今都城之大百倍州縣順天一府之民除投充各項差役外所餘無幾若驅之以就水土之工惟有逃移耳根本重地由此騷然誰執其咎營軍自景泰以來休養七八十年矣借用一兩箇月無傷城池軍馬二者相須城非軍無以守軍非城無以保以軍濟池不易之論於是內外提督僉從予議會題 上允所議命惠安伯張偉少監崔文侍郎童瑤督工給事中儲昱御史胡洵監工工興未幾旗手衛一指揮揚言河工官軍一日死者十餘人軍不堪命宜速停工士夫中亦有勸予止者予曰不然六萬軍不做工每日亦有

死者一日十人不多如何停工時戶部尙書孫交題稱六月興
工苦軍妨農且土王用事工不可興請暫停止候至秋涼挑濬
未晚具題 上命工部會同內外督工官議處六部中多如孫
言惟秦戶侍言西峯針線密勿易視之孫不然其言及子會各
官於右社門張崔亦欲停止科道惟予視予曰夏月熱入水挑
泥頗便且日長一日有兩日之工秋月涼入水挑泥甚苦且日
短兩日無一日之工況土王用事四時有之夏秋一耳古者兵
農爲一凡興工必妨農今也兵農爲二雖興工於農何妨此河
自正統以來未濬今通流處少淤塞處多中間沙與岸接葦如
樹高以池爲路者亦在一處再不挑濬何以壯觀瞻嚴保障哉

科道力贊其議張崔亦信其說本部題覆命下准擬數月
完九門城河淤塞悉除通流無滯中外臣民快覩喧傳復命
之餘彭司馬始信予言不妄孫司徒亦覺已見難行蓋內閣三
老知予處事頗有微長而戶部二老不予知也

又云嘉靖改元今上首詔工部內官監錦衣衛科道各差官
督工將各房店營寺拆毀物料還官又朝陽門外有玄明宮德
勝門外有十景山等處宮寺亦在數內詔下中外臣工稱快
第委官計工浩大且涉禁內宮中人懷顧忌予以侍郎署印會
各委官議於闕左門下予曰此今日第一新政臣工當急奉
行衆曰然但合用夫匠數多當作何處予曰在我又曰此舉非

中貴意出入禁地搬運物料倘有踈虞不無累及又作何處予
曰在我又曰供給不貲當討錢糧充費亦當併處予曰在我議
畢諸委官未甚予信予卽議內府拆毀物料就在內官監各廠
寄收候有工作於此取用該監委官收掌免移出外豈致踈虞
在外者本部委官收候乃借修倉夫匠明日大倉夫匠數百赴
工五日後通倉夫匠倍其數代之十日後又借天津三衛運木
軍千名一月一代前項夫匠於拆毀工素稱慣熟班軍又皆壯
健踴躍赴工勢如破竹不數月房店營寺宮廟蕩然靡遺中外
駭傳委官歎服莫知所自時予領 勅提督修葺京通二倉工
畢夫匠千餘空閑又領 勅領天津三衛下班軍萬名運營建

大木亦以大木未至空閑月久故拆毀工程一時得以借用且
各有月支口糧不煩供給省便如此此豈偶然前項不經不法
汚我神都禁地久矣電掃霆除宜有待於今日雖機會之巧逢
亦造化之冥助也曠非非材得乘此以效微勞以塞 明詔豈
非平生一大慶幸也哉

又云正德中御用監歲派料價倍於弘治以前之數不下五六
千兩 今上登極工部題派稿尙書李鏊左侍郎劉永璜以右
侍郎俱已書題字付科寫本而李劉俱致仕去該司請予首僉
予閱稿所派料大濫於稿面上大書查弘治年間稿看一日該
監差二三人來言稿已看定付本科寫今止換本頭衆大監上

覆作急進子曰取稿看上有查稿字該吏即將弘治稿對差一倍予令吏照舊稿寫二三人說遞年派定不可減予指數件難之花椒木何用曰造琵琶子曰上不好音樂楠棗木何用曰刻神道子曰上不好鬼神三人語塞子曰事冗不暇一一汝三人回申意老太監十餘年來天下軍民困弊皆科派冗濫之由今幸遇 聖明御極光復 祖宗節檢之風正在今日惟賢內相共贊其成部中止照弘治以前稿題派費監倘不依定將遞年歷費經該人員叅請 上裁來日爾三人再來知會次日三人至道衆太監回說都依部裏老先生主張議同盡將正德年間增派之數削去題奉 欽依派行天下其他監局年例料

價悉照弘治以前舊則題派所省歲以數萬非過 新政清明
豈能不變至此宗社之福天下蒼生之福

又云酒醋麪局竈凡若干座周圍鑄鐵磚成造面與門皆鐵版
也初派歲用煤柴等料就併鐵料派行自是歲以爲例該價五
六千兩予初轉尙書一日放牌罷有一人持狀跪堂下欲言不
言予揣知其意屏左右問之乃以實告磚係鐵造可經百年每
歲一派財費民疲利歸官作不下萬兩今經若干年矣言畢予
卽遣郎中金藻押告者徑詣繕工司盤出見年多派料物入官
拘獲官作赴部取供併叅該局內臣以聞奉旨依擬改革內外
官作悉從寬貸自此該局每歲止派造酒醋等料鐵磚等料盡

革除之歲省五千餘兩將來不可數計矣

又云惜薪司柴炭以供 內府煙爨之用派該真保大名河間
濟東兗青登萊等府僉夫採辦供應名砍柴夫各府屬州縣設
官管領而總領又告設有府官工部又設侍郎一員領 勅督
理其事公署住劄易州地方名曰山廠歲終具完過數造冊親
齎赴京奏繳其事亦重矣比因解夫累民改擬解價每柴一萬
斤該價四十七兩其價亦重矣赴廠交納官爲召商每萬斤領
價十二兩僱車一輛領價八兩解運到京攬頭領價二十七兩
運入該司往往不能完報又攬新價以補舊數大率每年完欠
相半完者係那移欠者係侵費數十年來不知侵欠幾十萬兩

其弊亦大矣利歸攬頭害及委官老死於廠妻子流落他鄉予
每憐之思爲之處訪得後軍都督府給派有該司柴炭遞年召
商完獲實收方給價銀每一萬斤止給四十兩柴無拖欠價無
侵費法良價省予遂做之題 准通行該廠革商停車在京革
攬召商完獲實收方給價銀每一萬斤省價七兩自此有完無
欠該司所收一年之數過於往時數年之積後又題 准各府
州縣委官止存十之二三餘悉裁革起送改用近聞侍郎亦
准取回止以郎中代之該司又有內官柴炭前此已准折價甚少
不在此數本部又有郎中坐臺基廠管收光祿寺等衙門柴斤
定價不等今亦革攬召商減價所省不貲有完無欠積弊掃除

殆盡各項柴斤奸弊淵藪百餘年來未有清之者璜於此費精神任怨謗多矣幸遇 聖政清明以此得收成效不然中貴之齟齬奸攬之抗拒欲以獨力勝之亦難矣

又云一司禮及近侍等太監病故 先帝亦有恤典該工部題派通州抽分竹木廠支版木輓廠支輓馬鞍山等灰廠支灰行順天府後軍都督府各派夫支價共約三四十兩給與造葬差千戶一員督工中有効勞年深勤勞顯著者添造享堂而止無碑亭之類正德年間權璫用事比照文臣造葬事體於工部支價多者五百兩少者三百兩工部不敢奏派但於別項料價內那借月積日累將及萬餘嘉靖初予署部印節該太監乞恩不

下十數人俱奉 旨如前予竊謂 新政清明釐革宿弊此其
時矣然必處之停當未可輕舉未幾司禮一太監乞葬事予嚴
責該吏查出舊稿乃懷恩例也遂照此題奉 欽依悉復弘治
以前事體各該衙門應付數各不多本部無復那借之累此雖
一事 朝廷恩典不濫 祖宗舊章不亂工部錢糧不耗其爲
利益無窮此皆仰伏 宸斷於上以此中外臣工奉行於下不
敢二三如此類者多矣

又云工部班匠每年例該分撥 內府各該監局做工數各不
等東廠每季該匠五十名折價九十兩自僱匠作應用積襲歲
久以爲舊規嘉靖改元一切弊政俱奉 詔例釐革惟此干涉

緝事衙門無敢議者一日營繕司郎中楊最言曰廠中匠價有礙予曰當革乃令四司送匠彼有修造支價僱匠與用廠中官校乍見闕然數以危言恐各司官吏作等有被逮繫者賴提督東廠芮公賢覺之兩次密遣謹厚掾吏問予予曰舊行事體豈敢一槩釐革但公守備留都清聲美與中外傳聞今受朝廷重託匠價雖微終係宿弊不請改正他日訪知視予爲何人以此查照舊規送匠候有修造郎中支價應用如此庶不累公清德芮聞喜甚遣人齎刺來謝自此歲省匠價數百餘兩此一事耳非楊郎中之直不敢白非芮太監之賢不能從非朝廷新政清明中外臣工又豈得翕然奉行如此也

又云安陸修造 某王某公主墳湖廣巡撫黃中丞衷議該工料十餘萬兩除見有外計少九萬兩派本省四萬兩江西三萬兩廣東二萬兩題請 聖裁事下工部議處予聞安陸藩邸款有庄田租銀不下數十萬兩詢之中官戚里皆云無人敢討討亦不准予退思所處議得墳價悉照巡撫議擬派徵但今工程緊急各該地方多事徵解恐不及期爲照安陸庄田租銀數多合無一面借用濟急一面派行各省照數徵解刻期補還等因題奉 欽依料價准就於租銀內支用免派各省擾民命下中外臣工交慶 今上視民如傷從善如流如此類者不可殫述予署部事適當 新政之初千載奇逢當自勉也

童瑞字世奇四川嘉定州犍爲縣人弘治庚戌進士工科給事中十年陞本科右給事中十一年陞本科左給事中十三年陞戶科都給事中十六年陞浙江右叅政十八年守制正德三年補陝西左叅政四年調長蘆運使五年復陞廣西右叅政七年守制八年起陞湖廣右布政使本年陞河南左布政使十三年陞順天府尹十六年陞工部右侍郎嘉靖元年陞工部右侍郎六年陞本部尙書七年致仕

劉麟字元瑞號南坦江西饒州府安仁縣人南京廣洋衛籍父蒼廣洋衛千戶家金陵麟性資澄朗弱冠領弘治壬子鄉薦丙辰登進士觀政虞衡時科道龐泮等論劾外戚張氏驕橫執法

忤旨下詔獄拷治甚急公與歸安陸崑抗章申抹大意請通治道而來諫議帝王盛節一旦沮壞後有利害誰復敢言 敬皇爲之霽威獄寢解尋丁母憂制終除刑部河南司主事十八年陞本司員外郎錄畿內囚執法折中不拘成案疏雪冤抑無慮數百人正德二年陞刑部山東司郎中三年陞浙江紹興府知府抵郡躬理簿書清刑獄裁供應甫五月民皆嚮方逆瑾銜公在部時以事觸忤及出守又不修謁掾郎中時瑣事黜爲民越人扳呼如失父母爭致嘔公笑曰勤苦者君吾治不及劉寵敢蒙一錢惠耶旣去越人肖像爲小劉祠祀之求太宰王海日翁華紀其事於石歸值歲侵饗餐不給士大夫相率曰可使劉元

瑞至此耶湖州吳子玠施子侃慕公素行迎入湖相與論道蒙山之董塢與關中孫大初宜春龍子霓結社爲湖南五隱瑾誅起補西安府陝西戴之如越六年丁外艱都憲藍公章憂其無以爲喪檄諸司治車馬資悉却不受會宸濠構亂弗克歸安仁遂於吳興安厝九年服闋起陞陝西右叅政屬關內饑虜數入寇朝遣貴臣督兵議軍餉將加賦秦民諸司莫敢持公曰不可靖邊本以爲民今若此恐內難作亦可慮也貴臣變色曰憂民者獨叅政耶公不答適陝西有赴闕陳訴者命下公共圖其便議隨寢公乃覈侵漁括逋負邊儲竟以不乏十年擢雲南按察使十一年致仕十六年嘉靖更化起爲太僕寺卿值繼

疾留妻家侍獨旅寓每退食焚香如坐禪室元輔楊石齋過其門見雙藤倚戶飄香載道問曰此爲誰從人以公對楊公歎賞遣人致意去嘉靖二年陞都察院右副都御史巡撫保定等處地方飭勵屬官節財用存贓贖爲備荒禦虜計畿甸以寧因疾作四上疏得允歸六年丁亥再起大理寺卿七年陞刑部左侍郎本年年陞工部尚書公遇事不避嫌咨白吏部進退其屬凡銓除者悉訪才廉充任先是四司銀貨各在所司儲之出納各任司屬自擅弊日滋卒難稽核公上疏創建一庫逃在部後刷四司之財貯之特銓主事一人與御史一員同典出納又請侍郎一員專稽其數上嘉獎賜名節慎庫自是財無虛耗可屬亦

免於贓敗部中每歲內府二十四監局上供料價并不時題派
輒淆典式不受覆覈公考據前章或議罷或議減不輒徇又擇
其甚者十二事條上得 旨裁之省費十之四五中貴人由是
切齒八年己丑秋七月 上遣近璫督造龍袍於蘇松公謂監
局自有常供請停便忤 旨勅致仕十年辛卯安陸大雨 顯
陵殿宇滲漏以興工在公視篆時追論落職閒住退歸寓居長
興之瀆南坦一室頽如家無儲積郡守萬君雲鵬候之重其清
貧爲築讀書臺邑令楊君上林又爲之建堂曰廣心亭曰澣露
因阻涉乃架橋於門曰龍津劍德嘉遜謝絕塵事非慶吊不至
城郭郡邑之政絕口不談公卿臺諫推公行誼頗薦於朝有述

以告者若罔聞焉滿室惟圖書數卷朝夕省玩有所得輒書屏
間久之屏表裏斑如遇文儒至則展所蓄諸名家翰墨欣賞終
日曰吾堂不寶金玉不襲文繡敢以此侑觴晚歲好樓居力不
能營索友文翰林徵明繪神樓圖字之曰高明所廣其義集古
詩十六題以自況又題其楮曰半壁時觀我羣峯日可賓蓋蕭
然超脫於風塵之外者文冲泊雅淡中有奇崛氣皆冥與神會
詩擬盛唐書法宗羲獻尺牘片簡人爭寶之及山樓日久心鏡
澄徹妙契玄理以故聰明色澤彌老不衰至辛酉歲忽一日命
書曾點暮春者至咏而歸一段懸於正寢朝夕相對怡然自得
人莫測其故至四月二日無一語及家事神清氣爽而逝視所

懸蓋前知也享年八十有七 上聞賜祭葬贈太子少保謚清
惠宮保王浚川稱公孤處虛與而天地萬物變化之委瑣冥昧
靡不灼覩洞辨施而行之無所不極太宰既寧李公稱其彬彬
文質君子是皆觀公之深者

李默曰公傲居深陽嘗遣門人候之公引至臥內見四壁惟挂
書數束他無長物又二十年觴予峴山逸老堂了無宿具旋以
乳羊博市沽風雨蕭蕭欣然達夜其風尚如此嘗以爲公揆文
似公幹治財似士安剛介不撓似器之至於廉約省素家無餘
貲位列三事以功名始終此與東牟劉祖榮何異世稱二劉不
其然乎

章極字以道號樸菴浙江金華府蘭谿縣人其先出浦城宋相章得象之後生時有昶產象形者其祖松坡公喜曰吾家始自丞相得象后是子生有昶象之異此其兆也童子時穎慧絕倫授以句讀數過輒成誦雙瞳炯然亢日光不眩人皆異之伯太宗伯楓山翁授以易學講說輒能潛思究繹至夜分不寐又履繩路矩事無巨細咸恂恂不苟爲文章不事險怪下筆滾滾數千言而理自足提學趙公寬兩按金華校士以異等薦之遂登辛酉鄉試次年中壬戌春榜釋褐南宮以外艱歸哀毀骨立乙丑服闋授工部都水司主事管理沽頭岡有遺愛旣去而民思之立碑記其事正德丁卯改刑部廣東時逆瑾盜政士大夫重

足不敢出氣拯曰擇禍莫若輕遂以決不覆於瑾誣以復命
遲慢下錦衣獄數月調梧州別駕時夷獠數百人叫噪於馬平
單騎往諭之開以朝廷大義獠遂解散五年瑾敗遂陞南吏
司勳主事六年陞南兵武選司員外本年陞南車駕郎中時中
貴方橫多駕馬快船隻上戶紛然受害拯痛裁減之權要莫能
干以私民賴寧輯以中原盜起力贊大司馬講究戎政尋改北
兵車駕大爲冢宰楊遂菴所知陞廣東提學既至倡率標的立
章程以考衷樹風聲以彰教而賢者慕不肖者勸焉雖貴游子
弟咸斤斤自敕不敢干以私嶺南人至今頌之東湖吳公廷舉
於人少許可獨稱之不置乙亥遷爲右叅政撫循五嶺時新會

盜起爲梗鎮巡委提督諸軍遂懸兵深入擄其巢穴取渠首而
殲之者從多所全安捷 聞陞俸一級賞賚有差辛巳轉右布
政嘗視篆直指使者檄獎庶僚則按其可獎者施行之所否則
格不報迨左轄江公潮至私語其子曰章公此舉人所難也嘉
靖二年陞廣西左布政使至日檢舊例務省約裕民 朝廷爲
戚里陳萬年建甲第會派省藩羨餘一萬兩拯以廣西地瘠民
貧素無積財難以刮之惟軍門有犒賞餘銀乞將協濟以甦民
困巡撫張公嶺從之不煩括索而上下恬然時論難之陞都察
院右副都御史撫治鄖陽嚴武備興學校三年改蒞清寧理河
道適當河變二三喜事之臣欲別開新河拯以河性靡常悍猛

難制豐沛之淤塞因黃河之傍衝黃河之傍衝因上流之未濬
宜卽疏支河以殺其勢築長隄以防其衝然後挑通漕沛自無
淤塞之患不過費十萬緡自可成功且黃河爲患已非一日智
者不與水爭地惟順其勢而導之而其激盪變遷雖神禹不能
使九河常如故也後世或塞其決或隄其卑或疏其派皆隨時
救患者也弘治初河決荆隆口又決黃陵岡又決張秋當時嘗
濬孫家渡趙皮寨等處而後荆隆黃陵張秋等口可塞亦分洩
河怒之驗也况自河南歷直隸至山東之曹縣時長堤以禦河
患亦既有年爲今之計惟於單豐沛一帶爲堤以禦之不使淤
漕渠耳烏可輕易費 朝廷之錢糧絕閭閻之地脉變丘陵以

爲下舍川澤以爲高哉若曰神河叵測固非力所及必欲求別
遠圖以蹤陳宋之績則新河一開非棄百數十里之田爲巨浸
不可以爲河也 朝議不協以姑蘇盛公應期代之竟不底績

竹澗潘公希曾如拯議而工始集當河變之時漕渠阻塞南旺
一路運船盡膠於沙上下洶洶拯食不下咽寢不安席露曝禱
於泰山寧陽泉水忽涌數尺膠舟盡釋繼以天雨河漕獲達六
年盛公代會營造 顯陵命以少司空提督其事 廷議計費

六十二萬有奇方究厥工比至周爰咨輒殫心研慮僅用銀二
十六萬而大工煥然落成省下三十六萬餘兩別貯以備賑濟
拯素諳堪輿家乃於下流築埧以固堂氣濟明堂以開勝築培

高堙痺龍岡委迤以護佳城而後帝王之窟 聖子神孫億萬
年於斯矣事竣 朝廷錫以白金文綺明倫大典以彰厥勞已
亥秋 聖駕南巡登純德山徘徊久之謂夏言等六臣曰這工
儘好當時止做十八箇月諸臣以拯名對 上曰拯以某事去
意甚惜之郢中疫甚昕夕殫慮賑救饑疲民賴以全活者甚衆
八年陞南京工部尚書尋改北京工部尚書授資善大夫命侍
經筵大祀勅省牲分獻瀆岳籍田賜扶犁錦帶蠶室成 賜寶鉞
千緡拯代南坦劉公麟或言劉政不便當更之拯曰劉公節慎
帑藏釐革宿弊井然有經吾當守而弗失者也柰何變乎大學
士桂文襄公萼一日延六卿議事出海運一疏商之衆莫能難

拯曰海運比河漕固易但有風濤沒溺之患且天津等處近年海口淤塞自古未聞有濬海者桂遂止庚寅春夏言建議分郊朝廷命九卿議之拯以事關本部將順則立蒙眷寵然祖宗百五十年於茲一旦更之勞民傷財無益於事矧五星聚營室將有土木之漸東南民力竭矣豈可疲民以希寵乃上疏極論其事上大不懌然輿論籍籍肆拯讜言故上亦不能顯黜之又以請建仁壽宮不當聖心而權貴用事者勢甚薰灼益忤上意會饒州進籩豆以古式上怒適自西山勘事歸遂上疏自劾請不坐僚屬奉旨章拯職司營造郊壇大事每多違慢況燒造祭品行移却不奏請以致差繆誤事好生有負委任本當

提問嬉從寬着革了職冠帶閑住拯雖去而時論益重之大學
士方獻夫首薦之爲用事者所尼無何六卿周公用蘇公民王
公燿王公濶潘公鑑及臺諫董公進第趙公炳然等交章薦之
而侍御周汝員傅鳳翱王紳王獻之高封等按浙據鄉評相繼
論列於 朝庚子丙午言官起廢逸吏部兩疏名上請竟不果
蓋拯孝弟忠信出於天性與人樂易不設城府然於權貴紛華
澹如也謝事丘園葛巾野服與野老盤旋雲水間權呼酣飲若
素無勢位者足跡未嘗入州縣家事一不經心於天文地理醫
卜百氏之術靡不研精得其肯綮雖家居數十年而憂國之心
彌篤每占天文先事多驗輒夕不樂戊申正月卒年七十

蔣瑤字粹卿浙江湖州府歸安縣人弘治己未進士授行人司
行人十八年擢南京山西道監察御史正德四年改廣東道監
察御史六年陞荊州府知府九年丁憂十二年補揚州府知府
十六年陞陝西右叅政嘉靖二年陞湖廣右布政使三年陞江
西左布政使四年陞都察院右副都御史巡撫河南地方七年
改南院右副都御史八年陞工部右侍郎本年陞本部左侍郎
九年陞本部尚書十年加太子少保十一年以憂制回籍十四
年起南京工部

聶賢字承之四川重慶府長壽縣人嘉靖十一年由致仕都察
院左都御史再起本部尚書未任尋改刑部尚書詳刑部

秦金字國聲直隸常州府無錫縣人弘治癸丑進士嘉靖十一年由南京戶部尚書改任時廟工方殷夙夜在工督事維謹料理有法大工賴之考績加太子少保十四年調南京兵部尚書叅贊機務詳南京六部

林庭棊字利瞻福建福州府閩縣人弘治己未進士授兵部武庫司主事十四年調職方司主事十八年陞職方司員外郎正德元年陞武庫司郎中三年調職方司郎中四年陞蘇州府知府六年陞雲南左叅政十年養親嘉靖二年起補江西右叅政三年陞湖廣右布政使四年轉左六年陞都察院右副都御史巡撫保定六府兼督紫荆等三關七年回籍聽用八年陞南京

兵部右侍郎十二年召改工部左侍郎十四年陞本部尚書十五年加太子太保十六年致仕二十一年卒於家贈少保諡康懿

甘爲霖字公望四川敘州府富順縣人嘉靖癸未進士授華州知州五年調澧州知州六年陞刑部河南司員外郎七年陞工部屯田司郎中八年建大工改營繕司郎中十年陞太僕寺少卿十一年陞太僕寺卿十二年陞工部右侍郎十四年陞本部左侍郎十五年陞本部尚書提督工程十六年革職閑住

溫仁和字民懷四川成都府華陽縣人弘治壬戌進士嘉靖二年由侍讀學士陞吏部右侍郎六年轉左本年兼學士掌詹事

府事丁憂十五年起吏部左侍郎兼翰林院學士掌院事十六年陞工部尚書兼官仍舊十七年改禮部尚書兼翰林院學士加太子少保掌詹事府事

毛伯溫字汝厲江西吉安府吉水縣人正德戊辰進士任御史巡按湖廣風采凜凜嘉靖元年任大理寺右寺丞三年轉左六年陞巡撫寧夏右僉都七年閑住十一年起撫山西未任改巡撫順天本年回院十二年陞本院右副都御史十五年陞都察院右都御史十六年陞本部尚書提督工程十七年遷兵部尚書兼右都御史仍協管都察院事歷太子賓客十八年行邊十九年出撫安南歷太子太保兵部尚書詳兵部

楊志學字遜夫湖廣長沙府長沙縣人彭城衛籍弘治癸丑進士嘉靖十七年由刑部左侍郎陞任本年遷刑部尚書詳刑部周敘字子厚湖廣九溪衛籍河南息縣人正德辛未進士授大理寺右評事十年陞本司左司正十四年諫南巡降永嘉縣縣丞十六年起陞韶州府知府嘉靖三年陞四川副使七年陞四川右叅政八年陞陝西右布政使九年陞陝西左布政使十年陞都察院右副都御史巡撫遼東十二年改南京都察院右副都御史兼提督江防十三年召入爲大理寺卿十四年改戶部右侍郎提督倉場十五年陞兵部左侍郎本年陞都察院右都御史總督宣大軍務十七年陞工部尚書提督工程本年降木

部左侍郎仍督工程十八年致仕

張潤字汝霖山西平陽府臨汾縣人弘治壬戌進士正德八年任戶科都給事中九年陞順天府丞十三年陞都察院左僉都御史巡撫順天等府本年丁憂十六年起原官巡撫寧夏嘉靖二年回院管事四年陞本院左副都御史六年閑住十八年起原官陞戶部總儲左侍郎十九年陞工部尚書二十年丁憂二十四年起南京吏部尚書詳南京吏部

顧璘字華玉應天上元人弘治丙辰進士嘉靖二十年任本部尚書督工承天不任以部事晉南京刑部尚書詳南京刑部

樊繼祖字

山東鄆城人正德辛未進士歷兵部尚書嘉靖

二十一年起工部尚書採木被劾未任詳兵部

王以旂字士招應天府江寧縣人正德辛未進士嘉靖二十年任兵部右侍郎二十二年陞南院右都御史二十五年遷任二十六年改左都御史本年陞兵部尚書兼督團營尋以兵部尚書兼右都御史總督三邊軍務

文明字用晦江西袁州府萍鄉縣人錦衣衛籍正德丁丑進士除刑部陝西司主事十六年陞雲南司員外郎嘉靖元年養病三年補陝西司員外郎四年陞廣西司郎中八年陞湖廣副使十一年陞湖廣右叅政十二年陞陝西按察使十四年陞陝西右布政使十五年陞浙江左布政使十八年陞應天府尹本年

陞都察院右副都御史總督南京糧儲二十年陞南京刑部右侍郎二十一年召改工部右侍郎二十五年陞工部左侍郎二十六年陞本部尙書二十八年卒於官